## **АЖРИМ**

(суд хужжатининг ижро этиш усулини ўзгартириш ҳақидаги аризани қаноатлантириш тўгрисида)

Когон шахри

2024 йил 1 март

Когон туманлараро иқтисодий суди, судья Ф.Муродовнинг раислигида, судья ёрдамчиси М.Насуллоеванинг котиблигида, даъвогар "ARK ECO TEXTILE CLUSTER" масъулияти чекланган жамияти манфаатида Ўзбекистон Савдо-саноат палатаси Бухоро вилояти худудий бошқармасининг жавобгар "Нарзилло фермер заминлари" фермер хўжалигидан 23.965.557,22 сўм асосий қарз ва 9.106.958 сўм пеня ундириш тўғрисидаги даъво аризаси юзасидан чиқарилган 2023 йил 7 июндаги хал қилув қарорининг ижро этиш усули ва тартибини ўзгартириш тўғрисидаги Мажбурий ижро бюроси Қоровулбозор туман бўлимининг аризасини ўз биносида очиқ суд мажлисида кўриб чиқиб,

## АНИҚЛАДИ:

Иқтисодий суднинг 2023 йил 7 июндаги ҳал қилув қарори билан "ARK ECO TEXTILE CLUSTER" масъулияти чекланган жамияти (бундан буён матнда даъвогар ёки МЧЖ деб юритилади) манфаатида Ўзбекистон Савдо-саноат палатаси Бухоро вилояти ҳудудий бошқармаси (бундан буён матнда Палата деб юритилади)нинг даъво талаблари қисман қаноатлантирилиб, "Нарзилло фермер заминлари" фермер ҳўжалиги (бундан буён матнда жавобгар ёки ФХ деб юритилади)дан МЧЖ фойдасига 23.965.557,22 сўм асосий қарз, 1.300.000 сўм пеня ҳамда олдиндан тўланган 33.000 сўм почта ҳаражати, шунингдек Республика бюджети ҳамда Суд ҳокимияти органларини ривожлантириш жамғармасига 661.450,84 сўм давлат божи ундирилган.

Хал қилув қарори қонуний кучга киргач 2023 йил 10 июлда ижро варақалари берилган ва ушбу ижро ҳужжатларига асосан Мажбурий ижро бюроси Қоровулбозор туман бўлими (бундан буён матнда МИБ Қоровулбозор туман бўлими деб юритилади)нинг давлат ижрочиси томонидан ижро иши қўзғатилган.

Бироқ, жавобгарнинг ҳисоб рақамида пул маблағлари йўқлиги ва унга тегишли мол-мулклар аниқланмаганлиги сабабли 23.965.557,22 сўм асосий қарз, 1.300.000 сўм пеня ҳамда олдиндан тўланган 33.000 сўм почта харажати ундириш ҳақидаги ижро ҳужжатининг ижросини таъминлашнинг имкони бўлмаган.

Шу боис МИБ Қоровулбозор туман бўлими 2024 йил 7 февралдаги 10-13-24/-87-сонли ариза билан судга мурожаат қилиб, суднинг 2023 йил 10 июлдаги ижро ҳужжати бўйича ижро этиш усулини ўзгартириб, жавобгардан МЧЖ фойдасига 23.965.557,22 сўм асосий қарз, 1.300.000 сўм пеня ҳамда олдиндан тўланган 33.000 сўм почта харажати ундириш бўйича ундирувни Қоровулбозор тумани, "Бўзачи" МФЙда яшовчи жавобгар раҳбари Ҳайдарова Азиза Ориповнанинг пул маблағлари ва бошқа мол-мулкларига қаратишни сўраган.

Суд мажлиси вақти ва жойи тўғрисида тегишли тарзда хабардор қилинган ишда иштирок этувчи шахслар, вакил иштирокини таъминлашмади.

Ўзбекистон Республикаси Иқтисодий процессуал кодекси (бундан буён матнда ИПК деб юритилади) 342-моддасининг бешинчи қисмига кўра, агар суд хужжатининг ижроси давлат ижрочисининг иш юритувида бўлса, ундирувчи, қарздор ва давлат ижрочиси суд мажлисининг вақти ва жойи тўғрисида ариза келиб тушган кундан эътиборан беш кундан кечиктирмай чиқарилган суд ажрими орқали, ушбу Кодекснинг 127-моддасида назарда тутилган тартибда хабардор қилинади. Суд мажлисининг вақти ва жойи тўғрисида тегишли тарзда хабардор қилинган мазкур шахсларнинг келмаганлиги аризани кўриб чиқиш учун тўскинлик қилмайди. Шу сабабли суд, ИПКнинг 342-моддаси талабларидан келиб чиқиб, аризани уларнинг иштирокисиз кўриб чиқиш мумкин деб хисоблайди.

Суд, иш хужжатларини ўрганиб чиқиб, қуйидагиларга кўра аризани каноатлантиришни лозим топади.

ИПК 342-моддасининг биринчи қисмига кўра, ижро ҳаракатларини амалга оширишга тўскинлик қиладиган объектив ҳолатлар мавжуд бўлганда суд давлат ижрочисининг, ундирувчининг ёки қарздорнинг аризасига кўра суд ҳужжатининг ижросини кечиктиришга ёки уни бўлиб-бўлиб ижро этишга, ижро этиш усулини ва тартибини ўзгартиришга ҳақли.

Ўзбекистон Республикаси Фуқаролик кодекси 48-моддасининг биринчи ва учинчи қисмларига кўра, юридик шахс ўз мажбуриятлари бўйича ўзига қарашли бутун мол-мулк билан жавоб беради. Юридик шахс муассиси (иштирокчиси) ёки унинг мол-мулкининг эгаси юридик шахснинг мажбуриятлари бўйича жавоб бермайди, юридик шахс эса муассис (иштирокчи) ёки мулкдорнинг мажбуриятлари бўйича жавоб бермайди, ушбу Кодексда ёки юридик шахснинг таъсис ҳужжатларида назарда тутилган ҳоллар бундан мустасно.

"Суд хужжатлари ва бошқа органлар хужжатларини ижро этиш тўғрисида"ги Ўзбекистон Республикаси Қонуни 48³-моддасининг иккинчи қисмига асосан тегишли қарздор юридик шахсларга нисбатан ижро ҳаракатларини амалга оширишда ундирувни хусусий корхона мулкдори, муассаса мулкдори, фермер хўжалигининг раҳбари, деҳқон хўжалигининг аъзолари, ишлаб чиқариш кооперативининг аъзолари, қўшимча масъулиятли жамият иштирокчилари, тўлиқ ширкат иштирокчилари, шунингдек коммандит ширкатдаги тўлиқ шериклар пул маблағларига ва бошқа мол-мулкига қаратиш ижро ҳужжатини ижро этиш тартиби ҳамда усулини ўзгартириш орқали амалга оширилади.

"Фермер хўжалиги тўгрисида"ги Ўзбекистон Республикаси Қонуни 35-моддасининг биринчи ва иккинчи қисмларига кўра, фермер хўжалиги ўз мажбуриятлари бўйича, шу жумладан тузилган контрактация шартномаларига мувофик давлат эхтиёжлари учун қишлоқ хўжалиги махсулоти назарда тутилган ҳажмларда етказиб берилишини таъминлаш бўйича, шунингдек моддий-техника ресурслари етказиб берилганлиги ва хизматлар кўрсатилганлиги учун ўз вақтида ҳақ тўлаш бўйича қонун ҳужжатларига мувофик ундирув қаратилиши мумкин бўлган ўз мол-мулки билан жавоб беради. Фермер хўжалигининг бошлиғи фермер хўжалигининг мол-мулки етарли бўлмаган такдирда фермер

хўжалигининг мажбуриятлари бўйича ўзига қарашли мол-мулк билан қонунчиликка мувофиқ субсидиар жавобгар бўлади.

Ишдаги мавжуд хужжатлардан аниқланишича, суд хужжатларини ижро қилиш жараёнида жавобгарнинг хисоб рақамида пул маблағи мавжуд бўлмаган, унга тегишли мол-мулклар аниқланмаган. Ушбу холат иш хужжатларидаги далолатнома, маълумотнома ва бошқа далиллар билан тасдиқланади. Бундай холатда суд, аризани қаноатлантиришни лозим топади.

Юқоридагиларга асосланиб ҳамда ИПКнинг 195, 196 ва 342-моддаларини қўллаб, суд

## АЖРИМ КИЛДИ:

Мажбурий ижро бюроси Қоровулбозор туман бўлимининг аризаси қаноатлантирилсин.

Суднинг 2023 йил 7 июндаги ҳал қилув қарорининг ижро этиш усули ўзгартирилсин.

Жавобгар "Нарзилло фермер заминлари" фермер хўжалигидан даъвогар "ARK ECO TEXTILE CLUSTER" масъулияти чекланган жамияти фойдасига 23.965.557,22 сўм асосий қарз, 1.300.000 сўм пеня хамда олдиндан тўланган 33.000 сўм почта харажати ундириш бўйича ундирув "Нарзилло фермер заминлари" фермер хўжалиги рахбари Қоровулбозор тумани, "Бўзачи" МФЙда яшовчи Хайдарова Азиза Ориповнанинг пул маблағлари ва бошқа мол-мулкига қаратилсин.

Ажрим устидан шу суд орқали бир ойлик муддат ичида Бухоро вилоят судига апелляция тартибида шикоят қилиниши (протест келтирилиши) мумкин.

Судья

Ф.Муродов

